

takiwa motuhake kia mana ai aua tikanga whakahaere i roto i aua takiwa ka whakaritea nei na reira ka mana te Kuini i runga i tetahi pukapuka mana he mea tuku i raro i te Hiiri nui o te Kuingitaanga Huihui ia wa ia wa ki te hanga ritenga whakahaere pena kia ahei ai nga Maori kite whakahaere i ratou ahakoa e taupapatu ana e rereke ana aua tikanga Maori i nga ture me nga ritenga whakahaere o Ingarani e whai mana ana etahi wahi ranei ki Niu Tireni ki tetahi wahi ranei o taua Koroni "A notemea kua tu tetahi huihuinga Rangatira e huaina ana ko te hui o te kotahitanga ki te Waipatu i te 11 o nga ra o Aperira, 1893, kia tonono atu ki te Paremata nui o Niu Tireni kia homai tetahi mana motuhake kia whai ritenga ratou ki te whakahere i o ratou whenua papatupu whenua karati whenua tiwhikete whenua memoria whenua rahui ranei i raro i te mana o tetahi Komiti Maori a notemea e hiahia nui ana nga Maori kia tu rite ratou ki te iwi Pakeha e kaha nei ki te whakahaere ritenga mo ratou ki te hoko ki te rihi ki te mahi katoa i nga mahi pewhea pewhea ranei mo o ratou whenua me a ratou taonga e mau motuhake ana kia ratou a notemea kua tuhia tetahi pukapuka kawenata i waenganui i nga Rangatira Maori o Niu Tireni he mea haina na nga tangata e 21,900 me era atu pukapuka apiti kia tonono ki te Paremata Nui o Niu Tireni kia homai kia ratou te mana whakahaere i o ratou whenua me te mana whakatu Runanga e huaina ana te ingoa ko te Huinga Kotahitanga kia whakaturia hoki he Runanga Ariki e te Runanga Nui o tenei Huinga kotahitanga a notemea kua tupu ake nga raruraru nui i raro i nga ture whakahaere whenua Maori me nga Ture Kooti Whenua Maori na reira kua whakaaro nui nga iwi Maori ki te rapu tikanga e puta ai he ora mo ratou kia meingatia e te Runanga Nui o Niu Tireni i roto i te Paremata e noho huihui ana i runga hoki i tona mana enei tikanga e mau ake nei:—

1. Ko te ingoa poto o tenei Pire ko te Ture Huinga Whakamana Kotahitanga o nga Iwi Maori 1893.
2. Tenei ingoa te Maori ko nga Maori tuturu me nga hawhekaihe o te taha Maori.
3. Ka ahei tenei Huinga Kotahitanga ia wa ia wa i raro i te panui kite whakarite takiwa Komiti Maori whakahaere whenua.
4. Ka ahei tenei Huinga Kotahitanga ia wa ia wa i raro i te panui ki te whakamana i nga Komiti whiriwhiri a nga takiwa ko aua Komiti takiwa kua e neke atu i te toko whitu.
5. Ka whai mana tenei Huinga Kotahitanga ki te hanga ture whakahaere mo nga takiwa Komiti kia ahei ai taua Komiti ki te whakahaere take whenua e panuitia ana kia whakawakia e taua Komiti.
6. Me haina me hiiri rawa e nga Komiti Takiwa a ratou whakataunga ka tuku mai ki te Huinga Kotahitanga apiti atu kinga pukapuka katoa o nga whakawa ma te Tumuaki o te Huinga Kotahitanga e tuku atu ki te Kawana kia whakamana nga Karauna karati ota tiwhikete ranei.
7. Me tae mai nga tonono whakahe, whakawa tuarua ranei i roto o nga marama e toru ki te Tumuaki o te Huinga Kotahitanga me ata whakamarama mai hoki e nga kai tonono nga putake whakahe o ta ratou tonono.
8. Mehemea ka kore e tae mai he tonono whakahe i roto o nga marama e toru hei reira tuku atu ai kia whakamana e te Kawana te mahi o nga Komiti e te Tumuaki o Te Kotahitanga a kua hoki te Huinga Kotahitanga tona Tumuaki ranei e whakararuraru i te whakataunga a nga Komiti Takiwa mehemea ka kore e tae mai he tonono whakahe.
9. Ko te mana hoko a nga Maori kia rite tonu ki nga Pakeha kia pera me nga tamariki pono a te Kuini.
10. A te takiwa e paahitia ai tenei pire i muri mai hoki e kore e whai mana te Kooti Whenua Maori ki te whakawa whenua haunga ia nga mahi kua whakaotia e te Kooti Whenua Maori.

*Approximate Cost of Paper.*—Preparation, not given; printing (1,525 copies), £4.

By Authority: SAMUEL COSTALL, Government Printer, Wellington.—1893.

*Price, 6d.]*